

玄覽堂叢書續集

第二十九冊

文獻堂藏書

卷二十一



總督四鎮奏議卷之十目錄

薦舉各鎮大將疏

薦舉兵備官員疏

薦舉各鎮部臣疏

薦舉地方人才疏

舉劾有司官員疏

舉劾四鎮將領疏

薦舉營衛官員疏

薦舉庶職疏



總督四鎮奏議卷之十

薦舉各鎮大將疏

題為薦舉各鎮大將以重邊務事臣奉

命入部督屬各鎮大將例當薦敘照得鎮守遼東總

兵官太保兼太子太保寧遠伯李成梁忠義可

貫於金石威名久震於華夷功益懋而德益謙

高風聿追大樹頭自白而心自赤衝邊允藉長

城鎮守薊鎮總兵官署都督同知張臣久負飛

將之名屢建吞胡之績棒槌崖直驅千虜以填

溝壑至今猶憚其威墻子嶺創建五臺以樹金
湯各路皆以為式鎮守昌鎮總兵官署都督僉
事張邦奇魁幹則三軍皆為仰視長才則百事
立見先登厲兵秣馬練成細柳之營塹谷堙山
永見苞桑之固鎮守保鎮總兵官署都督僉事
陶世臣孝義永敦七世操持不染一塵遍歷東
陸處處有干城之績一領右輔人人感醪續之
恩以上四臣皆元戎之選所當薦揚內李成梁
久自効於匪躬數控辭於軼掌顧百勝之威群

胡方為落膽而孤懸之塞本官難以息肩宜仍
久任以俟優異者也伏乞

勅下兵部再加查訪將李成梁久任張臣等紀錄則
聞寄得人而邊務有賴矣緣係薦舉各鎮大將
以重邊務事理未敢擅便為此具本專差千戶
張大庸親齎謹題請

旨

萬曆十五年六月

初一日

薦舉兵備官員疏

題為薦舉兵備官員以重邊政事臣奉

命入部督屬各道兵備官員例應薦叙訪得密雲兵

備右叅政郭四維當大事屹然山立辨群才朗

若鑑懸以精詳宏遠固桑土之防以俊偉光明

負鎖鑰之望易州兵備右叅政余國賓察民隱

明於觀火畫邊計審於持衡安集流移而歌興

鴻鴈表儀群屬而節樹羔羊永平兵備右叅政

葉夢熊歷內外臺堅持勁節馭南北軍茂著宏

猷練車騎銳在宣威專節鉞雅堪托重寧前兵
備右叅政劉易從運勝筭以備衝邊而轉弱為
強練銳師以創黠虜而出奇為正苦心苦節偉
度偉才開原兵備右叅政王緘譽望夙隆於卓
異勛猷懋著於孤懸制虜有奇策而化鷹為鳩
訓武有餘閑而揮文如錦海蓋兵備兼苑馬寺
事右叅政郝杰籌兵食見文事武備之兼長畫
戰守知興廢舉墜之立効卓有豪傑之才雅稱
拊綏之寄分守遼海兵備右叅政果在庭檄桑

以圖邊事更急於家事投醪以鼓降夷大創乎
群夷雅度宏才雄風偉望并陘兵備副使喬巖
風裁夙振於西臺露澤久敷於右輔歷齟齬樹
中流之砥柱拯溝壑布寒谷之陽春天津兵備
副使王來賢爽明出以精詳明達運以果毅當
水路之孔道而風清弊絕馭軍民之雜居而綱
舉目張昌平兵備右叅議于達真文武具足而
經緯有章威愛並施而間伍胥戴才已試於長
駕遠馭器允堪以投大遺艱以上諸臣皆一時

監司之選所當薦揚以備大用者也伏乞

勅下吏部再行查訪如果臣言不謬將郭四維等紀
錄擢用則邊臣益奮而邊政益修矣緣係薦舉
兵備官員以重邊政事理未敢擅便為此具本
專差千戶張大庸親齎謹題請

旨

萬曆十五年六月初一日

薦舉各鎮部臣疏

題為薦舉各鎮管糧部臣以重邊計事臣奉

命入部督屬各鎮管糧部臣例當薦敘訪得密雲管糧署郎中事中書舍人劉任慎德精於繩檢偉略裕於淵涵便軍便商而露澤弘敷不矜不伐而冰操益著薊州管糧郎中吳中傳厚重出以精詳明爽持以慎密嚴稽出納而逕竇咸清預便轉輸而軍民胥悅永平管糧署郎中事經歷馬翰如司民牧夙著循良理兵食大徵籌略裒

益積儲以通參伍之變綜核浮冗以成畫一之
規昌平管糧主事謝文炳溫文確有執持精察
不為剋核發侵漁之奸而鼠穴盡塞畫轉輸之
便而露積益充以上四臣才品俱高所當薦揚
者也伏乞

勅下吏部再行查訪如果臣言不謬將四臣紀錄擢
用則餉臣益奮而邊計有賴矣緣係薦舉各鎮
管糧部臣以重邊計事理未敢擅便為此具本
專差千戶張大庸親齎謹題請

旨

萬曆十五年六月初一日

薦舉地方人才疏

題為薦舉地方人才以備推用事臣奉

命入部督屬地方人才例應薦舉訪得原任兵部尚書王遴抱經文緯武之全才樹立懦廉頑之鉅望運宏籌於帷幄而九塞風清持危行於始終而萬仞壁立原任兵部尚書張學顏壯猷久振於三韓勁節端持於兩部安內攘外捷書屢奏膚功移孝為忠

眷命大孚輿望原任戶部尚書張守直以節約為

國計持籌以禮讓為里仁嚆矢羔羊素絲終始見
操持之介陽春白雪著作占神思之清原任南
京禮部尚書劉斯潔心如水而門亦如水德如
山而度亦如山不問家人生業每事崇雅黜浮
惟務君子躬行真足移風易俗原任兵部侍郎
賈應元運經綸於掌上富兵甲於胷中制強虜
則威聲雷動能用夏以變夷談時事則指顧風
生真席珍以待聘原任順天巡撫右僉都御史
耿隨卿濟世鴻才清時嶽望洛下吳下隨在著